

寶慶府志

44270.143

136

2160

寶藏寶藏
百四十三卷
中卷編三卷

道光二十有五年開雕於邵
州瀟溪書院開四年刊竟

寶慶府志序

寶慶府古邵州地所屬一州四縣首尾沅湘控臨黔粵東北距湖南行省五百里而近號爲輿區使者自道光六年官湖南布政使中閒再撫湖南今年秋奉

命閱伍南楚值廣西賊匪蠢動郡屬之新寧城步戒嚴分命將吏防勦甫定蓋使者二十餘年閒觀政於湖湘之日最久以親是故於郡屬之山川疆域土俗民風聞之習而知之詳郡故有志自乾隆閒太守鄭之僑踵修之後歲月緜邈文獻缺有閒焉於是前守黃君宅中今守張君鎮南謀所以重新之者而聘郡人鄧湘臯山長任纂修之事凡三年而書成請序於使者嘗慨方志猥陋侈陳風土假借附會昧厥甄限列傳縛於家牒藝文浮於總集而輿圖戶籍之要附綴焉已爾鈔撮焉已爾因山水而

寶慶府志序

有郡縣不通乎鳥道準望之術則圖測不確也因郡縣以析民居不綜乎姓氏村落之綱則土著無徵也是書最凡紀七表十圖二記三書六略二錄五傳四而於山水戶籍輿地形勝關隘險要尤詳哉其言之夫志者志也宗史而祖書書以道政事史以効得失凡以示人行政之方俾資於教養承平之日勿狃於宴安是書也成使守土之人一覽而山川疆域土俗民風如視諸掌焉於以體

國經野度地從政使吾寶慶之民同登康樂和親之書於永禩也是則守土者之志也夫是則使者之志也夫道光二十有八年春太子太保總督湖廣使者裕泰序

寶慶府志序

或曰志者史之一體也白扶風因龍門八書增爲十志地理志居其一范書改名郡國實與地理無異是郡國又志之一體也雖然列天下之郡國爲數卷則史不可以志賅若一郡國自爲一志俾疆圉廣袤道塗夷險政教所出風俗所成類聚羣分人傑物華各有攸敘則可以兼史之衆體今夫士君子有所著述豈徒取其名而已哉必將綜鉅細敷本末挈綱領布條目語語悉歸於實而後爲天下有用之書況郡國所施行必資於志脫令猥瑣挂漏擇不精語不詳戾乎常經昧乎時變守土吏雖日披載籍而絲棼緒亂開卷茫然欲有裨於實用豈可得哉故善作志者必先究心於史體也余蒞任之初晤寶慶太守張君知黃君宅中攝篆時延書院山長鄧君重修郡志已次第脫稿而

寶慶府志序

序三

一

未見其書也今歲初冬新寧獠不靖余奉檄往討過郡城鄧君出書見示事竣旋省乃得從容觀之其書凡百四十五卷較舊志增多卷中各體之名悉準諸史其采訪條例凡七於鄉村界址山川里數以及民居氏族爲郡邑志從來未及者尤致意焉夫界址明則防維易也里數析則跋涉便也氏族別則宗法具也綱無弗舉目無弗張鉅細無弗周本末無弗貫雖僅一隅事乎而衆體完備足以抗蔚宗追孟堅駸駸乎入子長之室矣猶憶軍事方興余未暇觀全書先觀其形勝圖記楚粵毗連之境漢獠交錯之區何地可守何地可攻何地可出奇何地可設伏靡不瞭如指掌昭析無遺用以誘賊離巢遣兵夾擊殲渠執訊勦撫兼施甫及三旬干戈遂戢此皆仰仗

聖天子德威遠播稟受 制軍 中丞韜略總戎以下諸將弁與

令丞倅士民同心同力得上慰

宸念之勤余未嘗有績也而犄角扼吭管見亦不無偶中實賴圖記有以導之余於是歎務虛名襲僞體者果不足與言志也若是書者變事藉以行權經事更可知宜守土吏誠悉心繙閱明辨篤行將見一郡數百里內疆圉鞏固道塗肅清政教日隆風俗日厚則其有裨實用豈祇在今日平糶一事哉第賞其名目之古謂正史而外並別史雜史諸體莫不兼之博雅閎通生面獨闢猶淺之乎測是書也道光二十有七年十二月旣望署湖南按察使事鹽法長寶道歸安楊炳堃序

寶慶府志序

道光二十有四年余以湖南古丈坪同知權守寶慶檢閱郡志自乾隆間鄭東里太守修輯後迄今八十餘年缺漏殊多竊念表章文獻守土之責欲修舉焉而慮秉筆之難其人也明年春敦延新化鄧湘阜先生主講濂溪書院課士之暇相與商榷搜討重加纂述先生耆年邃學好古情深嘗有楚寶之編沅湘耆舊之輯固已擷翹林於杞梓揚幽馥於芷蘭矣茲又以郡志之修慨然自任桑梓之見聞既確老成之學識尤精因急率僚屬士民籌費開局并招致通敏博學者佐分校之勞文質彬彬一時稱盛已而余遷貴州大定府知府是年夏六月卸事代者爲郴州刺史吳君士俊而新太守張君鎮南亦於秋七月至長沙則余鄉人也二君與余同官而又皆同志聞修志之舉各忻然

寶慶府志序

序四

曰此乃政之急務君雖去後必踵成之又明年夏邵陽縣訓導彭君洋中書來具言志已脫稿先後授梓人促爲序言并諸簡端序則余不敢作顧區區未竟之志則有不能不告諸後來者因以其意郵附簡末期其事之相與有成也先是郡西郭故有召伯祠久圯前年葺而新之王茂才遐襄向余言城南甘棠鋪古樹無存欲於祠前補栽棠樹使召公遺蹟允著是邦又濂溪周子以永州通判來攝郡事遷學於牙門之東南今邵陽縣學卽其故地尙書度支郎中孔延之作邵州遷學記詞義甚美碑已無存余嘗欲覓佳石書而鐫之碣於學宮俾學者仰止景行知所嚮往此二者皆余欲爲之事以遷去不果曾以語訓導彭君庶幾其終成之乎訓導書又言濂溪書院向有謝公祠祀明郡守謝貞肅公省日久圯廢有新化周監生者願出貲重修而

鄧先生之戚陳之弼訓導議於書院建邵州五忠祠以祀邵人
劉孔暉盧大受陳君寵何天衢林青暘五公是皆以忠節著聞
載於郡志者郡人士慕義之風不尤當表而出之耶若夫鄧先
生以修史之筆修志是書之成將與朝邑武功並垂不朽有識
者自能辨之無藉乎余言至吳刺史張太守之後先繼美及郡
僚紳士之協力贊成俱已詳著卷端亦無俟鄙人贅述也道光
二十有六年冬十月癸丑朔河曲黃宅中書於貴州大定府署
之鑑心堂

寶慶府志序

賢人君子之生於其時其地豈偶然哉孔子嘆杞宋文獻不足夏殷之禮無徵蓋傳世既遠典冊放失無人焉網羅舊聞纂述之以詔方來學士大夫事有所可疑政有所不通無所質信小子後生無由考古識遠以牖其聰明而激發其志氣非細故也今天下郡縣莫不有志矣然非殫見洽聞通達古今蓄道德而能文章而天又予之以寬假之歲月使得優游著述萃文獻於一身者爲之必不足以信今而傳後乙巳之秋余承乏出守寶慶寶慶宜有志未得見也先是吾鄉黃惺齋太守權郡事因寶慶志修自乾隆閒今缺漏過甚亟宜修適新化鄧子立先生方主郡城濂溪講院遂以相屬子立復引其友鄒君相助既開局會惺齋擢守大定去吳君傳巖繼之鄒君別去而以其事諄屬

寶慶府志序

序五

邵陽學彭君彥深爲之左右而余適受代至因得從彥深與子立從容商榷閒日親造局中相與上下其議論益習而於是書親見其成之之勞與聞所以作書之惜世稱高似孫刻錄于欽齊乘康海武功志韓邦靖朝邑志爲方志之最顧其體例謹嚴援据精核無方志繁濫荒陋之習尙已然於一方吏治得失民生休戚安危之大則未之及是書兼四家之長而地志一門以州縣統鄉里以鄉里統村團都砦必詳著其去治遠近東西南北所接壤何村何團與夫山川關隘塘遞亭橋寺觀經涂縱橫閒道紆直之可藏伏出入準開方法分合伸縮一一爲之圖又仿華陽國志著其村內大姓又別爲氏族表奠其世繫里居使夫覽者瞭如指掌無事之時可行保甲之法有事則團練守禦方略皆具其中此則四家所未曾見及者蓋煌煌乎經國之鴻

猷資治之龜鑑也若夫人物列傳發潛闡微往往舊志所遺或敘述而不得其詳且要者爲博稽諸史及百氏記載金石碑版詳加甄錄俾忠臣烈士遺民逸老孝子悌弟可歌可泣之行百世下凜然如生所以扶世教勵風俗之意蓋諄諄焉又豈尋常方志所可同日語哉子立名在天下所著諸書多刊行海內方聞綴學之徒類能言之今郡志一書獨余先覩且身親其事爲快竊以謂是書之宏綱鉅目博瞻詳密與作者之通才偉識精神意量皆可以垂世行遠又念國有斯人向令出所學得行其用世之志其所建樹當別有在顧栖栖燕齊吳粵閒垂老屈就一冷官旋且棄去今七十之年神明不衰猶得從荒江老屋中一起而成茲不朽盛業此則天所畱以爲文獻交萃之身雖非邵人所得私然不可謂非邵人之幸也故於其書之成亟馳簡

告慰惺齋爲邵人幸亦爲吾輩守土幸且爲海內讀是書者幸也道光二十有八年冬寶慶府知府孝義張鎮南序

寶慶府志總目例言

紀 表 圖 記 書 略 錄 傳

右寶慶府志大綱有八目分三十六門編年紀事略仿史例爲紀一曰大政爲表十曰沿革曰疆里曰藩封曰世職曰職官曰武職曰巡歷官司曰選舉曰氏族曰士女爲圖

總目例言

寶慶府志

一

二曰形勝曰疆里爲記三曰形勝曰疆里曰山川爲書六曰吏曰戶曰禮曰兵曰刑曰工爲略二曰五行曰藝文爲錄五曰政績曰武功曰良翰曰使岷曰殘明爲傳四曰先民曰勝朝耆舊曰國朝耆舊曰列女卷末爲撫談凡紀之屬其卷七表之屬其卷四十有五圖之屬其卷十有七錄之屬其卷十有二傳之屬其卷三十有三撫談別爲三卷首卷六敬列 詔諭公典大凡一百五十二卷總二百餘萬言始於道光二十五年三月越二十九年六月告成敢云文省事增聊用發凡起例

寶慶自順治四年內附後又閱十二年始克底定二百年來

列聖詔誥

皇上諭旨雖僻在一隅而谿峒山徭時塵

睿慮其閒飭勵臣工勤求民瘼表彰忠藎諸大端煌煌

天語萬世典謨雖非爲一郡而發亦當敬謹登載然不敢分隸
各門也至學校壇廟祭祀大典係天下公行非一郡所得
專舊志樂章品物瑣細備載非志體也茲謹裒爲

詔諭公典二門弁冕全書不入卷數所以示尊崇亦以昭
限斷也

紀者記也所以記其事也史傳人事與地理相經緯地理
終古不易人事日異月新其閒治忽臧否災祥休咎史不
絕書不可勝紀今首列大政一門以編年史法書之起自
漢元朔五年至於 國朝道光二十八年凡歷代郡國建
置因革損益及凡命將底定之勞設官循撫之績年經月

寶慶府志

總目例言

二

緯首揭於篇若網之有綱標而出之一展卷而千餘年之
郡事瞭如指掌不待披全志而已得其要領矣故先之以
大政紀

郡古荊州域秦漢以來分隸長沙零陵爲縣爲國爲郡爲
州府軍路代異名更致難畫一今詳爲考定著其統屬釐
其分置析其離合省併又博采圖經地志諸書以實之言
不厭詳事惟求實一展卷而千餘年之提封圖簿歲集司
空者不待搜往籍而已在目前矣故次之以沿革表

志地莫先疆里明制分州縣爲鄉分鄉爲里分里爲甲
國朝因之田賦出其中徭役亦出其中然民田不無變易里
甲歲有收除於是因形勢之便設爲村團故里甲無定域
而村團有定居今志疆里而實以村團里甲村團分四正

四隅首列去州縣治里數里甲分都廂鄉里備列十甲姓名俾閱者按籍而披一覽瞭然所以備稽覈亦以重賦役也故疆里表又次之

志地莫重封建郡爲漢代食采六朝遙封故壤都梁夫夷昭陽侯國邵陵王公武岡高平子男諸爵炳焉馴至防禦龍興岷藩圭剖銀潢威輓遍於國中加以衛所世襲勲鎮開疆文武百僚之蒞官分職巡歷各官之奉使從事以及薦辟科目之殊途舉貢恩例之遞進雜然紛陳無以表之懼其湮且淆矣故藩封世職職官選舉諸表又次之言地理者莫先禹貢而於導山導水之後繼以錫土姓誠以地與民兩相維繫者也周官小史奠繫世國語司商協名姓又曰工史書世先鄭曰世卽世本之屬故譜牒之掌

寶慶府志

總目例言

三

古有專官歷觀前史魏書有官氏志唐書有宰相世系表而方志之書惟常璩華陽國志略言大姓費著蜀中氏族譜詳記宗派近會稽章氏湖北志稿一倡此議其書未成曾以其法修四路廳之永清志甚爲詳覈而儀徵相國亦存此議於文集中具徵通人雅識夫巨室者編氓之望也士族者齊民之表也章氏之言曰以直省領列郡以列郡領州縣以州縣領士族以士族領齊民天下大計可以指掌言故觀於士族之貞淫興替而知邑里之安危治亂寶慶雖乏巨戴而岷藩封國傳位十世指揮千戶聚處一城昔之衣租食稅腰金章紫者今皆列在平民入國朝來以難蔭膺世職者亦不一家而衣冠素族所在多有今立氏族一門首列爵次勲鎮次軍民編戶按其譜籍載其先

代展轉占籍之由其中仕宦必書舉貢必書務莫其世繫詳其里居而士女軼羣之倫閭巷負異之士以及疆場死事之夫閭閻殉節之女標其名姓皆大書特書庶眾寡可知淑慝可別宅里可風爭競可息而欲行保甲團練之法者亦不外是矣故以氏族士女二表殿十表之終焉

方志舊稱圖經周禮職方氏掌天下之圖土訓掌道地圖而大司徒以天下土地之圖周知九地域廣輪之數故圖學之於地理爲尤重今立圖記一門曰形勝凡爲圖二十以開方法計之每方四十里首列府城及四縣一州城營塘汛圖以重守禦次列歷代沿革圖以備稽考別爲形勝記一曰五州縣城郭之地二曰歷代防守之地三曰歷代用兵之地四曰歷代險要之地曰疆里凡爲圖三百九十

有四以開方法計之每方三里別爲疆里記大約分一縣爲若干鄉鄉轄幾村團大村各爲一圖最大者分爲二三圖小者約兩三村團合爲一圖周圍紆直各視其方圖各爲記每村團去治若干里東西南北與何村團接壤某山自某處起某處止某水自某處來某處去某至某幾里有某渠某堰某橋某廟某墓及名人遺蹟故老詩文皆附其下又著明村內大姓某氏庶幾無事之時可以知編氓之相與守望者何地相與扶持者何人而保甲之法隱寓其中及乎有事之秋可以知其若何聚集若何歸併若何接應而團練之法亦具其中又備書其村團之關隘藪澤塘汛涂徑若者爲行旅之所湊集若者爲道路之所經由若者爲盜賊之所藏伏出入皆可周知而土田之美惡民力

之豐歉關於民生政治者無不一覽而具矣

郡在萬山中資水發源經行郡境七百里其名山支川見於水經地志諸書者紀載不一其原委遠近分合必縷述無遺始稱完善近世方志雖不廢山川而記載猥雜全無法度夫山川之遠者或千百里近亦或數十百里而方志僅曰某山某水在縣東西若干里將指其源乎抑指其委乎其源去治近者其委必不近也其委去治近者其源必不近也則里數不可定也上流在縣東下流或轉而西上流在縣南下流或轉而東則方向不可定也山之首尾亦然衆小水之赴一大川也有先後有左右方志僅曰某水入某川而已而彼此之前後決入之左右不可得而知也而山亦有支分有起止而方志皆不言是皆志山水之過

也今以山經之法志山以水經之法志水計郡境之山千峯萬嶺其大者有三榦南榦爲江鬱閒山凡七支都八十一山西榦爲資沅閒山凡三十九支都五百八十三山東榦爲資湘閒山凡十七支都二百五十三山其餘小支各以類附而山之脈絡起止無不縷析水以資水爲宗所受之水大凡二十有四由所受之水以達於資者亦二十有四不歸於資而歸於湘沅暨桂林榕江者又一十有七其餘小溪亦各以類從而水之源委分合亦無不析矣

形勝疆里皆有圖有記山水但有記無圖以山水皆分見於形勝疆里圖中也夫圖學之不講久矣古人不曰志而曰圖經故圖最重蓋必明於句股深知形勢更能測星測景又有指南記星準表重測之器故其成圖也特精自秦

以來古法斷絕少有知者晉裴秀作禹貢圖條陳六法猶存古意國初胡氏渭中明六法而以鳥道爲要自是踵而效之者遂多然取鳥道之說亦未有詳言者近時方志一委之畫工書吏且塗飾名勝以相誇耀而圖中城郭廣袤皆畫整方除一城之外幾無地可見疆域以俗傳粗獷之法羣詫爲明爽何論圖學今增益六法按方搜討既成全圖始一一分割裂爲小圖又縮爲六圖其指揣方向鉤心鬪角以明形勢尋厯川涂萃推遠近以明分率用心良苦其法初畫紙爲正方格每方或四五十里或二三十里以府縣治爲中官方隅則分十二方十六方暨堪輿家所稱二十四向上北下南前東後西取古人六法約爲四要曰分率曰方隅曰鳥道曰道里凡作山疊數人字作山水

則爲雙綫經流稍闊支才分許乾流故道則墨填其中伏流則空之使勢連屬道路用疊點分界用單綫城郭略具形勢大小依率字書於中村圍峒寨則以□△○別之關則爲丁塘汛則爲卅橋則爲□渡則爲○無論官道小路經緯咸登委曲備寫而酌之以高下方邪紆曲貫之以津梁橋路圖旣茂密差卽易知別有寶慶疆里圖說見藝文史部地理茲不復贅

天有五行人有五事五事修而五行敘天人徵應之理微矣自漢書志五行詳錄伏氏洪範傳說及其占應後代作史者因之然於庶徵但紀災眚而不及休祥沈氏宋書因而作符瑞志宋史則兼採祥異嘉禾瑞芝與水旱札瘥備書於冊所謂因其事以考其時則休咎自見也至班史創

藝文志所以網羅載籍收拾遺經也歷代沿襲不改隋書則直稱經籍志近世方志乃以詩文當之郡箸述寥寂自唐末秋田咏史後曠歷歲時未聞接踵元明以降代有聞人兵燹風霜故老遺文半就湮沒舊志臚引陳篇詳徵歌咏且遠引風詩侈爲佳話而經史子集見於著錄及金石文字炳於碑版者反任其遺佚陋矣哀而錄之烏可緩與故繼之以五行藝文二略

方志每苦門類繁冗重複雜糅方家所譏夫志重紀載與朝廷六典通吏之官制戶之貢賦禮之學校兵之營汛刑之律例工之建造皆關係大政勒成一書原以備 國史之採茲釐爲六書官師建置繁簡遷移以及俸薪養廉之添裁掾役胥額之增減皆歸吏書戶口田賦倉儲屯政以及

鹽茶錢榷之目物產風俗之宜皆入戶書祀典學政祠廟鄉校則禮書所統也營弁塘汛驛站鋪遞則兵書所統也若夫出於禮則入於刑不可不特書之以昭炯戒起大役必動大工不可不詳書之以重民力故繼之以吏戶禮兵刑工六書

有陶士行歐元功之治行而後邵人知樂生有周茂叔張九韶之教化而後邵人知嚮學有柳公綽李公素諸人之詰戎而後邵人免谿峒之患有曾烈愍李節愍諸人之殉難而後邵人識忠義之重功在一時思永千禩循良之咏千城之頌烏可忘也乃若前代遙封未之國及之國而無事蹟可考者其人雖賢例不著錄若岷藩就封傳位十世二百餘年雖腥德時聞而時近事彰難任湮滅舊志紀載

缺如無以徵信又有明一代區區編郡指揮鎮撫千百戶百餘家偏處一城其中衛所子弟不少才諳足資紀載既非土著又異流官是宜別立一門以免淆混詩曰我有良翰此之謂也故繼之以政績武功良翰三錄

岷藩之國代有命使偉人名德接軫斯都洵不可無紀他若企鵲之失國永明之稱號闖獻之餘孽孫李之忿爭區區一隅蹂躪已極

熙朝肇興救民水火瘡痍甫起復有吳逆之變今則承平日久民不知兵而聞見異詞事已無考至武岡竄據尤關係殘明掌故

御纂通鑑綱目三編附三藩於後

諭令一體稱王免書僞字於三王死節諸臣均蒙

褒卹仰見

寶慶府志

總目例言

八

聖朝寬大之恩海涵地負政無所庸其忌諱衷而錄之不可略也故又繼之以使岷殘明二錄

襄陽著耆舊之傳桂陽存先賢之讚楚國人物見於古載籍者尙已郡文獻寥寥漢以前分隸長沙零陵古有其書今亡其籍無得言焉考之正史惟邵陽周琦一見晉書武岡鄧處訥一見唐書楊再興完者之倫一再見宋元二史此外分見統志通志及各家譜牒記載者自元以前徧爲搜討共得若干人代禪縣邈行故墜沒大較舉其一隅古曰在昔昔曰先民不復區別名目故繼之以先民傳

代遠則多缺略世近則易詳備自明以來薦辟科目學校三途並用梗楠之選圭璋之彥彬彬輩出璽書交馳於資邵之郊孝秀爭升於黃峽之野矣或迺明廷錫宴遽返鄉